

Von der Weihnachtskrippe

Hanne Assion-Bausback

Was hä'mir als Kinn uns früher no g'freut
uff unser Krippele in der Weihnachtszeit.
Wars' oft a norr bescheide un klee:
ohne Krippe wär's eefach ke Weihnachde gwee.
Im Advent is scho Moos g'hollt worn im Waald,
es war manchmool scho räicht bitterli kaald.
Un doch war uns ken Weeg zu weit,
sou hä'mir uns scho uff Weihnachde g'freut.
Es Krippe-Häuschle aus Börkeholz,
räicht Moos drüm rüm, do warn mir stolz.
Die Schööfli senn g'schtanne oft norr uff drei Bee,
im houche Moos hoscht des gar nimmi g'säh'.
Der Engel hot blouß no een Flüüchel g'hat,
un der war scho dreimool ogebabbt.
E manchi Figur war nimmi ganz,
awwer doch strahlt' alles im Weihnachtsglanz
am heiliche Oowed in der Schtuwwe dinn:
do war örscht Weihnachde for uns Kinn.



A uff die Krippe in der Kärch häwwe mir uns g'freut,
am Weihnachtsmorche, es hot oft scho g'schnöit.
Die Fenschder häwwe geglizert vor Kält,
wie in aller Früh der Wecker hot g'schellt.
Sunscht warn mir jo net sou schnell aus de Bette,
awwer früher war no morcheds em Sechse die Mette.
Denk iich's zurück an die Vergangenheit,
säh iich's vor mir, graad no wie höit.
Durch die Naacht klingt hell es Glockeg'läut,
un aus allene Häuscher kumme die Löt,
von der Voorscht owwe rab, von dunne em Daal,
die Weibslöt vermummt im Schnillje-Schaal.
Die Kärch is dunkel, awwer scho von fern
leucht von der Krippe her der Schtern
an Bööm, sou houch wie im Mörzebrünne,
un a des Licht aus em Schtaal mi'm Jesuskinnle.
Es war, als ob wörkli e Wunner wär g'schähe,
in der heilich Naacht, in Eisch un in Schnee.

Die Hirte gucke no ganz verschreckt,
an de Hiemel, wu sie den Schtern entdeckt.
En Engel, sou schöö, graad wie im Troom,
schweebt mit goldeni Flüchel houch am Boom.
Die Mutter Maria mit glückli-em Blick
denkt sicher an all des Elend zurück,
wie sie hot kumme g'sähe ihr Schtünnele
un net g'wüßt hot wu hii mit dem Kinnle.
Niemed hot norr e Eckeke g'hat,
sou hartherzi war die ganze Schtadt.
Jaa, wenn sie g'wüßt hedde, wer doo künnt,
het sie jeder g'numme, ganz bestimmt!
A der heilich Josef guckt zufriede un frouh,
daß er den Schtaal no g'funne hot un en Büschel Schtroub.
Wemmer des in der Krippe sou alles hot g'sähe,
hot mer g'wüßt, wie die Chrischtnaacht wörkli is gwee-e.



Dann hot mer no gwaard uff Dreikönich dann,
uff die drei Weise aus dem Morgenland.
Mit Königsmäntel wie aus Samt un Seide,
mit Krone un Turban un gold'nem Geschmeide,
e Kamel debei, un als Treiber en Mohr —
de Kinn künnt des höit no geheimnisvoll vor.
Mir häwwe vor Ehrfurcht un Kält gezittert:
die Kärch war sou kaald, daß uns die Lippe gebibbert.
Un dann des Knäukerle net zu vergesse,
uff des warn alli Kinn versesse,
des hot in eener Duur knauke müsse,
immer widder häwwe mir en Zehner nei g'schmisse.



Bis Lichtmeß, do war dann die Zeid vorbei,
un die Mutter hot g'saat: „packt die Krippe ei!
Wickelt jedes Figürle in Seidebabier,
gebt acht, daß joo nix droo bassiert!“
Hot mer g'sähe im Schpeicher manchmool unnerm Johr
die Schachtel mit Schööfli un Engels hoor,
do hot mer gedenkt: 's is ball widder sou weid,
un hot sich scho widder uff Weihnachde g'freut!